

長沙縣志卷之一

星野


元穹漠漠帝載無言下土茫茫坤輪誰縮指星分野無從訂
甘石之經劃野分星莫克窮亥章之步矧局占法於黃道之
數星盡遺列宿強割裂於中華之禹服概置要荒豈日月有
私照臨天地乃偏覆載乎存而不論以俟鏡機者折衷可耳
志星野 舊小序

長沙縣志

卷之一

星野

軫宿圖



七家分星異同之譜

次星	劉歆三統歷	費直說周易	蔡邕月令章句	陳卓景皇甫謐	一行大明大統
雙女宮	統歷	周易	令章句	初歷	世紀
鶉尾	楚分野	起張十	起張十	七度	七度
翼軫	荆州	三度	二度	一度	一度
辰在巳	至軫十	至軫十	至軫十	千七百	至軫十
	九十五	一度	一度	一度	一度
	九度	度終軫	翼十三	二太中	杪二十

長沙縣志 卷之一

星野

二

分野考

黃帝分星自張十八度至軫十一度為楚分

周禮鄭注保章氏以星土辨九州之地封域皆有分星鶉尾楚也

史記翼軫荆州

春秋元命苞軫星散為荆州

西漢志翼軫楚之分野今之南郡長沙皆楚分

費直周易起張十三度至軫七度為鶉尾荆州分

蔡邕月令章句起張十二度至軫六度謂之鶉尾

班固三統歷自張十七度至軫十一度為鶉尾於辰在巳分

野屬荆州

陳卓郡國躔次同

星經南宮赤帝其精朱鳥井首鬼目柳喙星頭張嗉翼翻軫尾司夏司火司南嶽

吳氏曰荆楚分野在鶉尾之次以今所用授時歷爲準起張十四度三十分至軫十度八分

唐書天文志翼軫鶉尾也初張十五度餘千七百九十五秒二十二太中翼十二度終軫九度自房陵白帝而東盡漢之南郡江夏東達廬江南部濱彭蠡之西得長沙武陵又逾南紀盡鬱林合浦之地自沅江上流西達黔安之左皆全楚之分自富昭度象龔繡容白廉州以西亦鶉尾之墟古荆楚鄖都羅權巴夔與南方蠻貊之國翼與味張同象當南河之北軫在天闕之外當南河之南其中一星主長沙逾嶺徼而南

長沙縣志

卷之一

星野

三

爲東甌青邱之分

唐書地理志軫四星其中次小者名長沙而長沙入軫十六度今考湘鄉屬古零陵餘州縣十有一北抵岳州之巴陵以及臨湘平江南表衡州之衡陽衡山鄱縣安仁迤而西南得寶慶之邵陽新化皆古長沙地爲軫之終度焉

張守節正義軫四星長沙一星左右轄二星合軫七星皆爲鶉尾於辰在巳楚之分野

明則主長壽子孫昌

邢昺爾雅疏長沙軫十六度今長沙寶慶衡州岳州所屬巴陵臨湘平江等地

宋天文志軫中一星名長沙亦曰玉衡

軫宿步天歌四星似張翼相近中央一箇長沙子左轄右轄

附兩星軍門兩黃近翼是門西四箇土司空門東七烏青邱子青邱之下名器府器府之星三十二已上便是太微宮黃道向上看取是

新定渾天儀軫宿歌翼東四星斜不整中央一箇長沙子右轄左轄附兩耳右有器府兼軍門土司空在翼邊存以次更有青邱七今皆虛位不足論

張謂曰長沙一星在軫四星之側上爲辰象下爲郡縣遁甲所謂沙土之地雲陽之墟可以長往可以隱居者也

欽定明史天文志長沙小星下應長沙 黃道經度入軫宿八度半

強 黃道緯度南一十八度少 赤道經度一百八十度少

強 赤道緯度南二十度強

長沙縣志

卷之一

星野

四

太乙統宗翼星與張星近其分野當南河之北軫在天闕之外當南河之南其中一星主長沙

軫宿星占

星經北星爲轄去軫五寸南星爲膏去軫一尺爲常欲其近軫則上下和睦遠則君臣相疑小而明則國祚安明大與四星等則兵大起微暗諸侯憂 長沙子一星在軫之中主壽命小而明則人壽長子孫盛軍門二黃星在青邱西天子六軍之門占以移其處爲道不通 土司空四黃星在軍門南主土功金火犯之天下困 軫南二十二星曰器府樂器之屬耀則禮樂興暗則有咎

三才發祕定時說小寒日卯正中星軫八度立春日寅正中

星軫八度驚蟄日丑正中星軫八度清明日夜半中星軫八度立夏日亥正中星軫九度芒種日戌正中星軫九度晉書天文志軫四星主冢宰輔臣也主車騎主載任有軍出入皆占於軫又主風軫星明則車駕備動則車駕用轄星附軫兩旁主王侯左轄爲王者同姓右轄爲異姓 又曰土司空四星在青邱西主界域亦曰司徒均明則天下稼穡豐

星野辨論

明郡人吳道行曰按荆楚分野總在鶉尾之次以今所用授時厯爲準起張十四度三十分至軫十度八分則長沙當在軫九度內矣乃諸說紛然淆亂余考楊孝廉府志補遺及星厯諸書已之分星張翼軫張十四入巳何待十七十八也軫

十度入辰爲鄭其地在京東西路竟陝間長沙豈能飛越至一十六度耶况晉書以武陵入軫十長沙入軫十六考世紀載一度爲二千九百三十二里武陵去長沙僅五百里豈至差五度乎大率新舊唐書俱云起張十五終軫九自房陵等處濱彭蠡之西得長沙費直起張十三終軫七以唐有袁李二太史精星厯費直精周易其說與授時厯相近卽各差一度亦歲差之法宜然此其說可據也至張衡云長沙星明主多壽世卽謂長沙爲壽星壽星屬辰與主壽之說不同星經以熒惑主荆楚癸卯應長沙但火爲熒惑出沒不常何以至楚按大撓甲子癸卯在大火之分非應長沙考太乙書則云長沙丁巳城也又長沙星史記謂是軫旁小星通志云四星

中次小者唐書云其中一星考軫宿歌曰中央一箇長沙子
謂爲軫旁與其中者俱非府志補遺又以長沙子卽軫四星
中一星然軫四星左右兩轄星長沙子實在中央比四星差
小今其圖具在斷非四星中之一星矣易曰天垂象見吉凶
今姑辨著之若此

陶汝節曰分野視分星古不謂地也地域不常分野則定故
國在此而星常在彼鄭氏所謂星土星所主土也郡國志但
書分野無辨星緯之文楊先輩補遺謂郡得星名乃詳論之
考吳氏續志所述皆楊氏語而楊所引據亦曰天文圖軫宿
歌惟中間中央一字之淆千里矣然史記曰軫爲車主風正
義曰軫四星居中長沙一星左右二轄合爲七星則中央與

旁一星之說具有索隱曰軫四星居中左右二星爲轄車之
象也而未及長沙今繪圖止五星耳然乎否歟吾輩安所折
衷而敢曰前人非也張衡司馬貞宋均皆古博學而精象緯
者請另爲一圖并存以俟鏡機之士

建安朱氏曰星野之說周禮其權輿乎所志天官而下家異
其說或差四五度六七度何其紛紛也考帝王世紀一度二
千九百三十二里以七度計之當差二萬五百餘里可謂細
故哉是篇用備討略若夫論定當俟博雅君子

長沙舊志沿革謂長沙之名起於周又曰星沙以星名余按
遁甲記沙土之祇雲陽氏之墟路史曰沙爲長沙乃少昊氏
生胙土於長沙故軫宿之中有長沙世紀亦曰其開國也於

長沙湘川記秦分黔中以南長沙鄉爲長沙郡則長沙之名始於洪荒之世而以之爲鄉爲郡則在後世耳星以沙而得名非沙以星而得名也又謂周封熊繹於湘故名熊湘注熊湘山在長沙益縣是熊湘以山受名也諸說概於分野較詳晉書桂陽入軫六度長沙入軫十六度按古桂陽郡今之州治也今之郡志故屬長沙國鄴亦長沙茶鄉舊地非軫六度屬因其方隅辨其躔次大約郡及諸州邑入軫六度者十之六入軫十六度者十之四然考驗度分細極微茫觀漢費直蔡邕魏陳卓及唐書所分軫度起止未有以楚屬軫十六度者似軫十六度猶在壽星之次爲鄭分地惟譙周京房張衡所論與晉書略同顧折衷爲已難矣不特是也凡星附列舍

者主其野五車附於畢此中一星曰司空主楚女下列十六星中一星亦主楚女齊分畢趙分彼附屬於其野而主占於他國將長沙及左右轄亦不必專占楚耶翼主樂府主遠客軫主車騎又主冢宰輔臣熒惑主悖亂殘賊疾喪饑兵數者皆不與楚協占其又何以別之耶然則天道遠人道邇星野之說又何可深求乎歐陽子曰聖人不絕天於人亦不以天參人蓋絕天於人則天道廢以天參人則人事惑故其作五代史書人不書天其旨微矣

府志論曰甘氏云軫七星蓋軫四星長沙一星轄二星合七星也黃帝占曰軫者以候王者壽命故置長沙一星以延期張衡大象賦長沙明而獻壽車轄朗而陳兵又十三州志漢

有萬里長沙祠西自湘州至東萊萬里故曰長沙漢長沙郡
晉永嘉初置湘州萬里之遠自此始矣惟天子之壽足以當
之故巫咸曰長沙明天子壽豐則軫宿所照殆不獨長沙一
郡矣又按晉書桂陽入軫六度長沙入軫十六度考漢費直
蔡邕魏陳卓及唐書所分軫度起止未有以楚屬軫十六度
者似軫十六度猶在壽星之次爲鄭分也惟京房譙周張衡
所論與晉書略同耳附記於此以俟司天者之考定焉
舊志論曰象緯之說爲天官家言各主所見由來久矣但天
遠人邇君子亦惟存而不論論而不議耳所錄歷代分野本
益陽志吳陶二論出府志建安朱氏說出益陽志而以通志
之辨終之談天者可勿深求矣書不可盡信讀書不求甚解

其此類耶又按史記長沙星不欲明明與四星等主兵張衡
曰長沙星亮主國家壽考子孫有慶一以明爲凶一以亮爲
吉占者宜何從焉

或又曰星野舊志辨之亦詳然或謂長沙子爲軫旁一星或
謂爲軫中一星不知天體圓而動其行左旋軫宿旋至天中
則左轄右轄四星平列人面南正視之長沙子恰在中央軫
宿旋至西畔則左轄移上右轄移下四星俱偏列人面南側
視之長沙子恰在右旁蓋軫共七星并無八宿爲中爲旁但
正側視之有異其實皆此一星也竊附以待參考

續志論曰粵稽在昔一日蝕梓慎曰大水叔孫曰大旱一風
災裨竈曰再火子產曰不害今長沙一星懸象萬載史記曰

軫旁一星唐書曰軫中一星史記曰明則主兵張衡曰亮則主壽其與捫燭揣籥扣盤聞鐘者幾何或曰存而不論可也按天秉陽垂日星地秉陰竅於山川成象成形陽施陰受理至不爽也顧局象緯以配廣輪道里懸絕指封域以求合辰次而宿度之東西相屬南北相麗又參錯而不能無毫釐差進求其似其惟唐浮屠一行之論乎一行之論宋鄭漁仲取之大約謂星與土以精氣相屬而不限於方隅其占測以山河爲限而不係乎郡國似爲近之抑楊文弱云天上一度有千里之懸豈一州一邑可各占一度而分之者則直以分野爲不足信然周官保章氏準下土之區域測分布之星躔各隸其方以求事應自來考步之家守

而弗失終不敢謂其說竟可廢也查中興天文志云長沙一星不附軫以屬吏自爲官故竊意郎官上應列宿長沙爲屬吏命名似非他比固不得概從統同論也